

# Jems

<sup>1</sup> Njai Jems, Anut inanen urat tamol, agod Tubun en Jesus Kristus san dam mi a. Ilo uyan Anut san gugoi 12 tan gidigheid lo dumado den sad na girek en ngane yau da.

## *Kubianek id dabai ipanad da*

<sup>2</sup> O teig muroug, muruan naon dugo dugo yak asini dop ilom uyan on a. <sup>3</sup> Man dugo, an alon ak saen ansam ilo rumok kubianek lo digane dan san nujon ilom lo igane ilasa dop lo atur sakar pe muruan asini san a. <sup>4</sup> Dabai agane dop ansam kagin uyanan an, nujon uyan uyan ak ilom lo igane ilasa wa, an lo ansam ilo rumok idaisuda geig a. Agop fun an lo an itaot atur ak, Anut san kagin kisaek ta lo adu san tia geig a.

## *Tamol manau tia dop igudani wa*

<sup>5</sup> An lulumam lo ta in manau uyan ak lo katukan tap, Anut isumiani dop in an ipani wa. Man dugo, Anut tamolpein fidian in dugudani den lo melmel uyanan ak ipidinai da. In dam tamolpein dusumiani dan ta ipidai na da. <sup>6</sup> Ak man in buben fidian Anut mi ipani dop igudani wa, man dugo, tamol buben raru raru den in san ilon nek ibol tim beig ifunip beig yau imul on dak igo ya. <sup>7</sup> Tamol naok ago man Tubun en mel ipani wak ago ilon ta isou na wa. <sup>8</sup> In ilon gidigheid yau dak, in san kagin fidian dam lo, dal kisaek ta iri na da.

## *Tamol yanad tia, tamol filiad da yak sad ru kagin*

<sup>9</sup> Kris tamol ta inj yañan tia man ilon ka uyan a, man dugo, murnap Anut yabisap yañak tubun ak ipani wa. <sup>10</sup> Kris tamol ta inj melmel wei mi aman da man dam ka ilon uyan a, man dugo, murnap inj nek ibol tamol yañan tia yak ilasa wonj a. Anut inj tamol filian anda yak aben tan en lo malan te yak ibisei san ago igane wa, nek ibol garan san ai bob an ilasad itapas yau kisaek onj dak ago mi a. <sup>11</sup> Id talonj ak, ad tubun idu dan ad luon sakar ak ilasa da. Saen an ai rouk fidian imagar yau dop sad bob ad itapas yau pe leil lo dam uyan tia ya. Nek ago mi tamol inj filian aman da yak inñsan urat fidian igane yan yabi idup yen dop ibisei yau a.

### *Kubianek san fun*

<sup>12</sup> Tamol inj itur sakar pe, ate suek lo muruan isini tap inj dam ka ilon uyan a. Inj ate suek an irinñani pasik tap, Anut inj murnap naon madok pempem san ipani wa, madok an kumaen panu lo yen da. Anut wagan ibol la ya, tamol inj ilon ipani mok tap inj kumaen imadop milaen a, an itout san tia ya.

<sup>13</sup> Tamol ta ate suek lo idu dop igo ta ibol na wa, “Anut ateg isue da.” Man dugo, aupasek Anut lo ta ipalu na da, agod Anut dam inj tamol aupasek lo ta idirai na da. <sup>14</sup> Tamol kisaek kisaek aupasek lo diau dudu dan san fun man, inñsigned ilo saiak an ilod inñanep aupasek digane da. <sup>15</sup> Agop inñsan buben imasa yan yaup nuñon aupasek ilasa da, aupasek an yaup tubun mi ilasa dop mateñ ile wa.

<sup>16</sup> Ago yak ninen o, ñai teig muroug, mel en ale dop ninen o sem ta irawan na wa. <sup>17</sup> Melmel fidian uyanan inj kagin fidian itaot ak da sad fudi man lak

na dien da, Tamad in an idirai idsad na dudu ya. Patui keit lo dided dumat da. Ak man id Tamad man ago tia ya, in lilaman san, agog dam ta ibilso ibilila na da. In lo man tidom tia, pempem itaot ago mi imado da. <sup>18</sup> Insen ilon ibol go, in san ru rumok an lo, id idiradsig in anen nanuk mok tilasa ya. Ago dugo Anut san melmel igane yan luluṅad lo id imug tilasa ya. Nek ibol ai ta malan malan nuṅon ifu dak igo woṅ a.

### *Uloṅ dop gane*

<sup>19</sup> Nai teig muroug, an ru kagin en aloṅ uyan. An fidian kududom agurep ru aloṅ uyanan, ilo isou agane gup ru abol a, agod tinṅaem dam ta saian kisaek oṅ na wa. <sup>20</sup> Fun dugo, tamol san tinṅae saiak an Anut san kagin uyan ta igane ilasa na da. <sup>21</sup> Ago yak ninen o an sam kagin saiak saiak fidian, an sam aupasek san naok naok fidian abiau dop sem ibian adup Anut san ru a bubem lo yen den ilom isoup ari wa, man dugo, ru an in dabai anda, an lo murnap materṅ san saen lo ṅutum ka ibinawi wa.

<sup>22</sup> Ru an kawan ta aloṅ oṅ na wa, aloṅ dop nuṅon dam agane kisaek a. An kawan aloṅ oṅ tap, sem irawan da. <sup>23</sup> Tamol ru ilon oṅ dop ta iri na tap, in sen naon tig lo ile igo woṅ a. <sup>24</sup> In sen mitilaen ile wo uyan gup yau a. Ago gug in sen naon dugo yan ilon in aon kisaek oṅ a. <sup>25</sup> Ak man kubiaen Kristus awan lo ilasa yan itaotan geig, agod kubiaen en subanek lo ipasad tilasag kawan tumado da. Enti kubiaen an tig igo woṅ lo naon ilep lo Kristus awan iri dop man, bar inane wa. Gug in kubiaen an kawan ta iri na wa, tia, Kristus awan ilon gup iri uyanan o maeg igane wa. In Kristus awan ilon

pe ilon injaon kisaek on san tia ya, tia, in awan ilon gup ilon san nunon an itaot fo mi igane ilasa wa. Tamol naok an Anut san bar inane wa.

<sup>26</sup> Tamol in ilo isou lo in Anut san tamol ibol dak pempem igudani dak man awan kagin ta ipani na dan in san ilo rumok an kawan a, an lo in sen irawi da. Agog in san ubou leil an dam kawan a. <sup>27</sup> Ubou san kagin ikok agod uyanan da Bai Anut malan lo man igo ya: nanuk bigabeg, pein suos, kaginad tigane dop in sad muruan lo tibinawai a, agod tan en san kagin tile dop bubed ta igane saian na wa.

## 2

### *Id tamol yan an tia yan ta tabi idu na wa*

<sup>1</sup> Nai teig muroug an idsad Tubun ak Jesus Kristus, kumaen panu san gurman an ilom lo rumok, ago tap man tamol pein yan ad anda yak mi kagin ta apidinai na wa, tia, tamol saiak saiak adi dam kagin apidinai a. <sup>2</sup> Tamol ta damag uyan uyan ak idirip an sam ubou ab lo ipalu dop, tamol ta biou n saiak saiak ak idirip dam ipalu wa. <sup>3</sup> On tamol biou n uyan uyan ak idiri an kagin pani wo uyan pe in rupei, “Aben uyanan en njanep masi,” ago dop tamol neinta an rupei, “Ago ila utur, tia dop igo tan na njeig fun na masi.” <sup>4</sup> An kagin ago agane tap, an lulu nam lo biatitek agane da. An gurman on alasag an siganem ilo saiak saiak lo abititai da.

<sup>5</sup> Alon, nai teig muroug, Anut tamol pein yan ad tan en lo tia yan yan ad inane wa, agod in ilo rumok lo idaisuda yan ipilianai la ya, an lo Anut dam san madok aben lo filian fidian ipidinai a. Man dugo, fidian enti in ninedi wo imat den, Anut promis

ipidinai ak ago igane wa. <sup>6</sup> Ak man an tamol melmel ad tia yan abiai dudu da. An alon ak tamol melmel wei mi ad da yan an dibian adu dop muruan dupanan da. In sed mi dijilian pe gurman naod na atur a. <sup>7</sup> In sed mi Kristus san yan an uyanan ipanan go, lo digian se yan lo, ru saiak saiak dubol ilasa da.

<sup>8</sup> Anut san girek lo kubiaen malan te yen dan lo igo ibol, “On se ni ne wo umat dak ago mi, tei murou sinjire na dam ni ned i wo umat a.” On an rumok uri tap, an nek uyanan mi a. <sup>9</sup> Go an aenta ael saiadi dop, an au apas da, an lo kubiaen ibol ago an kubiaen malan asue ya. <sup>10</sup> Tamol ta kubiaen fidian iri uyan dugo kisaek ipiti ni tap in kubiaen fidian ipiti ni mok a. <sup>11</sup> An san fun man igo won. Anut ibol, “Tamol ta sen turan san iwon da aupasek ta digane na wa.” Agog in fon ibol da, “Tamol ta fini imat na wa.” On kubiaen kisaek an uri dop, turan ta lo tamol funi imat tap, on kubiaen fidian piti ni a. Man dugo, Anut in sen kubiaen an fidian ibol dilasa ya.

<sup>12</sup> An dugo an in en dop kagin agane wak i? Alon uyan, saen Anut id bitinaek lo idirad an, in malan ipalug turad bubed tupidinai dop iliad o malan ipalu da. Nek fun an ni en o, on sa madok lo kagin ganep mado tap, ilo panek san dal uri wa. <sup>13</sup> Saen Anut bitinaek lo idirad dop, talpein a aenta ilon ta imunanai na yan, Anut talpein an ilon ta imunani na wa. Ilo munanek an tubun kasik, an ni en o on Anut ibio udu wo umoi tap, aenta ilo imunanai mok a.

*Kagin naok naok en ilo rumok san nunon mok*

<sup>14</sup> Njai teig muroug, tamol ta in̄ ibol, n̄ai ilog lo rumok a. Ago ibol ak gug, in̄san ilo rumok an in̄anen naok naok lo yan nuñon tia ya. Ak dugo, in̄san ilo rumok nuñon an tia yan ka ibinawi wak i? Man tia geig a. <sup>15</sup> Isop tei murou boi, lu murou boi, in̄ tinid san biouñ, tia, agod anañ diani san dam tia tap man, <sup>16</sup> oñ melmel anañ boi, biouñ direk san boi, an in̄ lo tia yak ta pidinai na, ago gug rupidaig ubol, “Awo, an̄ ilom maror anda amado. Ilom isoup kulos wananan san ak adiri gup, anañ tubun mok ani wa.” Kagin an ta uyan na, agod nuñon an tia ya. <sup>17</sup> Nek ago mi, ilo rumok kawan yen dop in̄anen naok naok lo nuñon tia tap, ilo rumok an imat a.

<sup>18</sup> Ak man tamol ta in̄ igo ibol, “Oñ ilo rumok ama da, gug n̄ai kagin naok naok uyan ak amag da ya.”

N̄aisag ru naon man igo, “Oñsa ilo rumok a kagin naok naok an tia yan kubiai dop n̄ile. Ago dop, n̄ai kagin naok naok uyan ak n̄igane dan lo n̄aisag ilo rumok n̄ukubiai dop ule wa.” <sup>19</sup> Oñ Anut kisaek mok an nin̄en o ilo rumok di? Uyan a, ak man an ta idaisuda na ya. Nek ago mi ur saiak saiak dam ilo rumok lo Anut kisaek dubol go dirut direr da.

<sup>20</sup> Oñ burau tamol! Oñ dag n̄ai n̄ukubiai dop ule o boi, ilo rumok naok an nuñon tia kawan i?

<sup>21</sup> Wagam en dugo woñ Anut in̄ malan lo id tubud baged Abraham iganeg itaot ilasa yak i? Abraham in̄siganen kagin naok naok lo in̄anen nanun ifuni imat pe utut fo imarip Anut ilo uyan ipani wo ago igane ya. <sup>22</sup> Oñ ule, in̄san ilo rumok in̄ kagin naok naok da sisem urat digane kisaek da. In̄san kagin naok naok an lo in̄san ilo rumok ilasa siñaokan a.

<sup>23</sup> Agog dal an lo ru a girek lo yen dan rumok ilasag ibol, “Abraham in Anut mi ilon lo rumok a, agog in san ilo rumok an Anut ileg ibol, in tamol itaot a.” Ago yak ninen o Anut ibol, “Abraham in naisag turag mok.” <sup>24</sup> On ule yak, an insiganen kagin naok naok amaiak lo man in Anut malan lo tamol itaot ilasa ya. An insiganen ilo rumok lo mi tia ya.

<sup>25</sup> Nek ago mi dal san pein Rahab in dam Anut malan lo insiganen kagin naok naok lo itaot ilasa ya. In sen mi ru sinek san tamol ilo uyan ipidinaig idinaig dal senamo lo dusol go diau a. <sup>26</sup> Ago yak ninen o tinid ur an tia man imat a, nek ago mi, ilo rumok urat an tia yan dam imat a.

### 3

#### *Bale tirni wo uyan a*

<sup>1</sup> Nai teig muroug an wei mi girek manau ta alasa na wa. An alon ak man girek manau man aenta lulunad lo Anut san bitinaek dabai mok ak lo mumado wa. <sup>2</sup> Id fidian aupasek funfun tigane da. Tamol ta in ninen lo aupasek ta igane na den, in itaotan, agog in sen tinin fidian dam ka iturni wa.

<sup>3</sup> Saen id bafolo nudun lo kam nanun tiganep tirae tap, bafolo tinin fidian mi itilanip njed abad iri wa. <sup>4</sup> Tia dop, wog tubun ak ilom isou. Gidad tim tubun ak ifurep wog an ididip yau a, agod wog an dam tubun mok, gug fei nanunan an nam unbek tamol mi, in ka wog dugo yau o imat dan igirip ago yau a. <sup>5</sup> Baled dam nek ago mi, sen ka nanunan a, ak man in dabai a, in ka melmel tutubun ak igane ilasa wa. Yai balen nanunan ak ka imasap dagui tubun ak igane inani yau a.

<sup>6</sup> Id baled dam yai onj a, inj tinid san boi luluᅇad lo kagin sisaiak sad gurman imado da. Baled an kagin saiak saiak funfun igane ilasa da. Inj iganep tinid ilon fidian nun ipani da. Ago iganep tinid san kagin yai wananan onj a, agop idsad turenj ilasa saian da. Agod Ades san yai amaiak baled lo yai igane ilasa da.

<sup>7</sup> Tamol inj ka melmel funfun itirnai a, agog wei mi kagin ipidinai la ya. Anakanak, bor kasik, goun kasik, kusenj funfun agog beig lo fon da mi a. <sup>8</sup> Ak man tamol ta inᅇsen balen balen itirni san tia ya. Balen yaes ta ibal na da, ru saiak saiak ibol yau wonj da. Inᅇsan balen dam ibol mot wagai ak onj, agod inᅇsan dabai tubun mok an lo tamol ka iginiai dumat a.

<sup>9</sup> Id baled lo idsiganed Bai Tubud tabol dan yaᅇan tabisa da, ago gug afon idsiganed teid taod tupudai saian da. Gug teid taod an Anut idirai dilasag ibol inᅇsen ago mi wonj a. <sup>10</sup> Ru ilo uyan san inj ru saiak saiak da sisem awak kisaek lo mi dilasa da. Njai teig taog, kagin an ta mok ilasa na wa. <sup>11</sup> Ka you ibanaip dal kisaek lo mi, gigen inj bulbal da dilasa wak i? <sup>12</sup> Nek ago mi papai ka anjar lo ilasa wak i? Aria, ka woi lo fud ilasa wak i? Nek ago mi beig lo you mok tinjane san tia ya.

### *Maᅇau uyan Anut san na idu ya*

<sup>13</sup> Enti anj luluᅇam lo inj kankan milaen anda, agod maᅇau uyan anda yak i? Tamol ago tap, inᅇsan madok uyan ak lo sen ikubiai dop tile wa. Inᅇsan kankan milaen an nuᅇon tap, san nuᅇon man mos kagin. Ago tap, mos kagin an lo urat sensen igane dop tile wa. <sup>14</sup> Ak man anj turak lo aenta eil saian dugo, njai-njai kagin lo yaᅇam tubun



ilasa wo agane da. Aria, kagin an bubem inanefute tap, se pitiano ru ta abol na wa. Kabelan sem irawan dop ru rumok san aben lo ru sewak agane banau. <sup>15</sup> Kankan milaen naok ago yan sewak a. An kumaen panu lo ta idu na ya. Tia, kankan an tan en san, an Urgun san tia, an ur saiak san mi a. <sup>16</sup> Man dugo, aben a ate turak susai agod n̄ai-n̄ai kagin dien dan, ante dam aban̄ pitin̄inek san kagin, agod kagin sisaiak fidian dien da.

<sup>17</sup> Ak man kankan milaen a lak na yak idu yan man igo ya: in̄san ilo isou fidian man ikok, in̄ tamol maror igansi san, in̄ tamol mos an, in̄ ilon dabai an tia ya, ilo mun̄anek tinan, in̄san kagin nun̄on uyan uyan ak mi, in̄ kagin kisaek ak mi iwae dak, agod ru rumok san a. <sup>18</sup> Tamol a maror digansi dan, maror lo sad ai patun dupae yan, sad urat san nun̄on man in̄ tamolpein didiraip Anut malan lo itaot dilasa wa.

## 4

### *Anut mi awan wabi wa*

<sup>1</sup> Fun ata mel nin̄en o an̄ lulun̄am lo wagai agane dugo nug apei adiri di? Bube imasa san kagin an̄ kisaek kisaek ilom lo yen da, agog an̄ tinim ilon fidian lo wagai igane dugo mel ta nin̄en o amat den dam an̄ane wo da. <sup>2</sup> An̄ melmel nin̄edi wo malam isi dak ta an̄ane na da. An̄ tamol afu dumat agod in̄sad melmel apasi asini wo ilom tubun mok imasa da, gug ta an̄ane na da. Ago agane dan fun dugo an̄ Anut ta asumiani na da. <sup>3</sup> Agog saen an̄ asumiani dubo man ta ipan̄an̄ na wa, fun dugo an̄ asumiani saian da. Melmel an̄siganem bubem lo aganep siganem tinim mi lo urat apani wo da.

<sup>4</sup> Anj Anut abisei ak ibol dal dal pein iwon ibisei ak igo woŋ a. Anj ta alon na yak, anj tan en ninen o amat tap, anj Anut san ager. Agog tamol enti tan en san turan imado wo tap, inj Anut patun ipanip Anut san ager igo woŋ a. <sup>5</sup> Girek an sen kawan ago abol banau, Anut san ru rumok girek lo igo ibol, “Anut inj tura susai kagin lo tamol sad ur ilod lo idiri an itargiranig imado da.” <sup>6</sup> Ak man binawek Anut id ipanad an san dabai idsad aupasek san dabai irinani a. Ago yan lo girek an igo ibol, “Tamol sed yaŋad disini den Anut patun ipidinai a, gug tamol sed ibiai dudu den inj ilon ipidinai a.”

<sup>7</sup> Ago yak ninen o Anut paen na au a. Ago dop Satan patum apani wa. Ago tap inj anj ibisawaŋ pe isol yau a. <sup>8</sup> Anut sinjiren na au dop inj anj sinjirem na ipalu wa. Anj aupasek tinami, banim afulani. Anj bubem raru raru amami, bubem akubune pasik pe ikok yen a. <sup>9</sup> Ilom idup tinaŋ aru agane wa. Anjsiganem silen an abilisap tinaŋ onj a. Ilo uyan amoi dop ilo muruan agane ilasa wa. <sup>10</sup> Anj Anut naon na sem ibiaŋ adu wa, ago dop inj anj ibiaŋsap lak na iginiaŋ a.

### *Tei tao ta biai dudu na wa*

<sup>11</sup> Awo, ŋai teig muroug, nug patun fo anjineŋ amoi. Tamol enti tein patun fo injineŋ dop tein bitinaek lo igane tap, an ta igane uyan na da. Inj kubiaen patun fo injineŋ, agog inŋsen tamol gurman onj ilasag, kubiaen bitinaek lo igane ya. Onj ago gane tap, onj kubiaen paen na man tia ya. Kubiaen an onj paen na yen o gane da. An lo onj tamol kubiaen ta iri na dak igo woŋ lasa ya. <sup>12</sup> Tamol kisaek o lian kubiaen ipanad dak ibitiniad a, Anut

iñsen mi a. Iñsen mi dabai anda, an lo na kagin ipanad dak agod an dam lo malad isue wa. Ak man onsa ilo isou lo onj tubu ubol di? Onj urat ta lo onsa tura murou bitinaek lo ta dirai na wa.

### *Niñeñ lo se yaña ta wabisa na wa*

<sup>13</sup> Aria, ñaisag ru alon, an tamolpein igo anñeñ den, “Gamu boi gabulo boi panu ta tubun geig ak lo taup anañar kisaek tumado wa. Ate tumado dop moni san urat biabi tigane dop sed niñed o moni wei mi tiñane wa.” <sup>14</sup> Ata wo an ago abol dak i? An gabulo san mel ilasa san an ta alon na ya. Ansam madok dugudo, an man nek ibol kakao ilasap kitekan ka yen dop itout yau kisaek onj dak igo wonj a. <sup>15</sup> Tia, an igo mi abol a, “Anut iñsen mi siganen ilo isou lo, mañ mumado dop en migane wo, tia, an migane wo, ago ibol dop migane wa” <sup>16</sup> Ak man an silei kagin lo sem mi abol da, agog yañam asini dugo tubun mi anñeñ da. An ago anñeñ dan saian geig a. <sup>17</sup> Tamol enti mel uyan ak igane san ilonj, go ta igane na tap, kagin naon ago man aupasek anda ya.

## 5

### *Filian tamol adi sad ru kagin*

<sup>1</sup> Agog gamu an tamolpein filiam amam da yan ñaisag ru alon. Madai funfun tinim lo ilasa wan niñen o ilom saian dop malam turon idu dop asa-sai a. <sup>2</sup> Ansam filian fidian igan yau dop tinim san biouñ simirer diani wa. <sup>3</sup> Agop ansam pat fidian dam teirteir lo isuda wa. Teirteir an an tamolpein fidian sam kagin saiak saiak ikubiai dop dile wa. Teirteir an ansam mudam mi yai inani wonj a. Fun

dugo, tan en san nal wadan lo anşam filiami an atumani da. <sup>4</sup> An tamol a anşam abi urat digane dan arawaig tinid ta adad na ya. Agog sad padau dam ta aloŋ na ya. Aloŋ, saen dipadaug diwagin an asau mi geig yaug, Anut in eŋel sad Gurman an kududon lo ilasa ya. <sup>5</sup> Anşam madok tan en lo man memel funfun amam da, anşam madok uyanan, agog an memel naod lak lak ak idaisuda, agod an dugo agane wo man ka agane woŋ da. An mateŋ san nal in muruan san saen lo dam ansem ifutuwan dugo sem tinim bulbal apani uyan da. <sup>6</sup> An tamolpein uyadi ak bitinaek lo adirai dak muruan apidinai dop kadi dam afu dumat da, man dugo, in dabai ad tia yan lo anşam dabai an diabiani san tia ya. Ago yak niŋen o muruan tubun ak anşam na ilasa wan niŋen o asasai dop atata wa.

### *Muruan lo atur sakar*

<sup>7</sup> Nai teig muroug, muruan lo atur sakar, ago mi yen yau dop Tubun en ipalu wa. An ale yak, tamol abi lo urat igane dak inşan abi ititianip imado yau dop anan ibes idu da. In saen milaen mok tok ibol imado dop ui san saen ititiani da. <sup>8</sup> An dam tok abol atur sakar a. Man dugo, Tubun en ipalu wo sumeik da. <sup>9</sup> Nai teig muroug, nug patun fo ta anurnur na wa, kabelan Anut an bitinaek lo idiran banau. Ale, Bitinaek Tamol sumeikan dalawan ate itur da.

<sup>10</sup> Nai teig muroug, Anut san profet ilom isou, in Tubun en yan lo diŋin da. In muruan in madai dam disini bo man dile dugo disini woŋ se ya, ago yak niŋen o an dam dal kisaek an ari wa. <sup>11</sup> Tamol a dutur sakar go muruan lo ta dibiakik na dan, id talon ak, in ilo uyan san tamolpein a. An

Job san madok itaot an aloŋ a. Job saen inŋ madai ile dop muruan isini se man inŋ tok ibol imado se ya. Agod inŋsan wadan a Anut inŋ ninen o igane ilasa yan dam aloŋ a. Job Tubun en ilo panek agod ilo muŋanek dam tinin inŋanfute yan ile ya.

<sup>12</sup> Ak man, ŋai teig muroug, mel tubun geig man igo, aŋ Anut yaŋan lo boi, ta tan yaŋan lo boi, ta mel gidad gidad ta boi lo siŋanem ru dabai ta apani na wa. Anŋsam awok man nek mel nuŋon ninen o gup awok abol a, ago dop tia man nek tia mok abol a. Kabelan Anut aŋ ibitianaŋ dop muruan ipanaŋ banau.

### *Ilo rumok san guduaneŋ*

<sup>13</sup> Aŋ ta luluŋam lo muruan isini di? Ago tap inŋ Anut san na igudani wa. Dugo, aŋ ta luluŋam lo ilon uyan di? Ago tap inŋ Anut yaŋan yabisa dop bar yabi wa. <sup>14</sup> Tamol ta luluŋam lo subam ifuni di? Ago tap midaeŋ sad matu igiaip, dupalup, ninen o dugudani dop Anut yaŋan lo gureŋ tinin diamisi wa. <sup>15</sup> Fun an lo gudanek ilo rumok san, an tamol subam anda yan iganep uyan ilasa wa. Agod gubak mi aupasek igane yak tap, Anut tamol an san aupasek ipasi yau pasik dop ilon ipani wa. <sup>16</sup> Ago yak ninen o nug naon na siŋanem aupasek afulale dop nug ninen o agudani wa, ago dop an lo Anut ikubuniaŋ a. Tamol itaot aman ak san gudanek dabai tinan, agog dam ka urat dabai ak igane ilasa wa.

<sup>17</sup> Nek ibol Elaija oŋ, Elaija man nek idsed oŋ a. Inŋ Anut san na ui ta idu na wo igudani, agog nuŋon ilasa ya. Ui tan na anaŋar utol wadan da, ta isi na

ya. <sup>18</sup> An itout go fon igudani da, agog ui idu dag, tan na anan nunon idiri ilasa ya.

<sup>19-20</sup> Nai teig muroug, tamol ta an lulunam lo kagin rumok ak ibisei dop anşam ta inanep dal uyan ak lo imul ipalu tap, tamol uyan an tein san nıtun matej lo yak inane imul a. Aria, kagin en ilom isou wa, tamol enti turan dal saian ak lo itor den ibinawi tap, tamol an turan san nıtun ta imat na san ago igane ya, agog san aupasek fidian dam imiamai pasik a.

**Anut san bilalug foun**  
**The New Testament in the Takia Language of Papua**  
**New Guinea**  
**Nupela Testamen long tokples Takia long Niugini**

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d